

Eligi pa Caribbean Hotel Association:

Jetty Tjung di Manchebo a bira supervisor di aña

ORANJESTAD(AAN)-- Un tremendo aplauso a acompaña e momento cu Harriette, Jetty, Tjung, Assistant Manager di Manchebo Beach Resort Hotel a keda eligi como Supervisor di Aña pa Caribbean Hotel Association durante nan lunch especial antayera.

"Miss Jetty" manera e ta conoci pa tur Arubiano y Miles di huespednan cu regularmente ta bishita Manchebo Beach Hotel, a worde eligi entre un cantidad di otro supervisor di hotel pa region Caribense.

Durante mas di 20 aña Jetty a sa di conquista e lugar cu e ta ocupa den curazon di huespednan di hotel, miembronan di staff y otro hoteleronan. El a cumpli cu su tarea na forma ehemplar.


Jetty a nace na Surinam y na edad joven a yega Aruba. Na a164a 1967 el a bira cahera na Manchebo pa despues bira Front Desk Supervisor, Head Housekeeper, Public Relations Director y na 1977 a keda promovi pa Assistant Manager.

Su file personal na e hotel ta vena cu cartanan di

gradicimento di turistanan satisfecho. Aña pasa, ora Jetty a recorda cu 20 aña pasa, el a drenta servicio di e hotel, cartanan a drenta di tur parti di mundo y 70 bouquet el a ricibi di publico di Aruba.

Ewald Biemans, General Manager di e Hotel, a muestra cu Jetty a contribui grandemente den e hecho cu awe e hotel ta conta cu huespednan cu kier regresa constantemente. Jetty ta atende tur detaye cu devocion y profesionalismo. Mustrando cu Jetty ta su man drechi, Biemans a considera cu ta na su lugar pa bisa cu Manchebo ta Jetty.

Ike Cohen, doño di e hotel tambe tabata tin solamente elogio pa Jetty, kende tabata tin un comentario na momento di su nominacion: "Esaki ta e momento grandi di mi bida y carera. Mi ta hopi agradecido. Tur dia mi a entrega mi mes 100 porciento na trabao. Den negoshi di hotel un hende mester bira y bolter cosnan, pero mi stima mi trabao y mi no ta decepciona. Cu placer mi ta anticipa hopi aña mas. Mi gratitud na tur hende."



Un grua grandi a presenta ayeramainta na edificio di Corte di Justicia, cu ta worde reconstrui. E grua mester a yuda pone e dak cu a worde construi pa Arends Construction na su sitio.

Mientras e dak a duna impresion di un labor profesional, DIARIO por a tuma nota di e ringbalknan cu ta afecta pa comehein. A pone klem di hiero rond di e balkinan, pero no a bira conoci ayeramainta si ta bay cambia nan.

